



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10



Sorkar atsüngdokba nung ED aser
CBI-i shilem magitsüla: Sanjay Raut

Copa America: Brazil
semi final-i iogo

VOL. XVIII NO. 260 (ADOK 260) DIMAPUR

AMUNGNÜ (SUNDAY)

CHITENI (JULY) 04, 2021

₹ 5.00

COVID-19 Nagaland: 69 dak putet, 94 taneptsü angu, 1 asü

Kohima, July 3, 2021 (TYO): Honibarnü Nagaland nung nisung 69 dak COVID-19 putet aser nisung 94 taneptsü angu.

"Tanü nisung 69 dak COVID-19 putet. Parnokji Kohima nung 19, Dimapur nung 14, Mokokchung nung 12, Zunheboto nung 6, Mon, Phek o Wokha nung pungugu (5), Tuensang nung 2 aser Kiphire nung 1 lir. Parnok züngsema nisung ajak agi 25,451 kumogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Honibarnü COVID-19 puteta alir nisung 94 tashi taneptsü angu. Parnokji Mokokchung nung 26, Dimapur o Peren nung ter tii (18), Zunheboto nung 14, Tuensang nung 10, Kohima nung 7 aser Phek nung 1 lir. Parnok züngsema taneptsü angur nisung 22,991 kumogo" ta paisa metetdaksü.

Nagaland nung taneptsü angur 90.33% kumogo aser tang nisung 1,253 anepaludar, ta Dr Kikon-isa ashi.

Tanü Dimapur nung COVID-

19 puteta alir ka asüba züngsema tasür 499 kumogo. Ajisüaka, nisung 14 bo tanga tashidak ajang asü, ta paisa shisem.

"Nagaland nung COVID-19 alitsü akok ta temolung melemi bilemba sample 2,29,924 tendangogo. RT-PCR ajanga 98,180, TrueNat ajanga 62,260 aser Rapid Antigen Test ajanga 69,484 tendang" ta Dr Kikon-isa metetdaksü.

Hokolbar tashi nung nisung 4,60,280 nem COVID-19 vaccine indang dose 5,36,990 agütsüogo, State Immunization Officer, Dr Ritu Thurr-ia ashi.

Vaccine agirtemji frontline workers 60,197, healthcare workers 15,823, arishi kum 45 ser temapur 1,54,328 aser arishi kum 18 nungi 44 tsüngda alir 2,29,932 lir, ta paisa ashi.

"Vaccine agirtem rongnungi nisung 66,710-i dose anaprong agiogo. Parnokji frontline workers 29,267, healthcare workers 10,627, arishi kum 45 ser temapur 26,972 aser arishi kum 18 nungi 44 tsüngda alir 24 lir," ta Dr Thurr-isa ashi.

Rosy aser Samuel Sangma na asüba atema FIR benoktsü akanger

Dimapur, July 3, 2021 (TYO): Nagaland nungi lanur tajung ana Gurugram nung taitüsü keta süogo aser mapang shia Nagaland senso aikati timtem aser maaksü ajurua arur, ta NPCC-i Honibarnü sangdong ka nung metetdaksü.

"Tena sür hopta ka tema süika post-mortem report magütsür aser iba ajanga ano terata talila bentsür arur. Külén, Nagaland Chief Minister-ia Haryana Chief Minister den iba onük jembitsüba sernung mejembir aser iba jagi state sorkari Nagaland sensotem atema meblemstür asü ta bilemer" ta NPCC President, K Therie-i sangdong nung ashi.

State balala nungi asen chirnur tasü mang bener arubaji tang mezüng masü. State sorkari asen lanurtem taküm aser parnok tarutsü kumzüka ayutsüla. Anungji Nagaland State sorkar iba tatalokba atema FIR ka benoktsü akhanger, ta NPCC-isa metetdaksü.

NPCC-isa state sorkar dang tasür kibong shia nem Rs. 10 lakh agütsütsü akhanger, ta parnokisa ashi.

June 24, 2021 nü Alpha Hospital Gurugram nung Naga tsür air hostess asür Rosy asüba nung taitüsü keta lir. NPCC Secy

Temjenyanger Longkumer aser NPCC Minority Dept Chairman Rajesh Sethi nati la asüba kuli bushitepa liasü, ta K Therie-i ashi.

Kidney stone aliba atema mozü ki tonga aoba sülen la asü aser ano hospital bills reprangdangra tashiyim agi sen meshiba ama lir, ta paisa shisem.

Külén, June 25, 2021 nü asür Rosy'er kinunger Samuel Sangma Altman's International Hotel takdang nung soset ta asüba nung tamangtsü mali, ta paisa metetdaksü.

"Asür Rosy nem ice cream chidaktsüba sülen la ali nung laoba atema asür Samuel-i doctor o staff dang astüngdang. Paisa par kinungertem dang tetsü tanutsü Rosy nem temeten magütsü tashi pa kidangi meyipa marutsü ta ashi. Iba anepdang 8.30 ako nunga pai Dimapur nung par kinungertem den phone ajanga jembisaka anepdang 9:00 ako nungbo pa soseter lia anguba osang angazük" ta K Therie-i ashi.

Nagaland House Delhi nung ketdangsurtem aser staff-i asür indang mang anepalua kidang bener yokba aser parnok akokba jenjang item tatalokba atema inyakba atema pelar, ta NPCC-isa metetdaksü.

Asür Toshi Wungtung den State Funeral agiogo



July 3, 2021 nü Dimapur nung Nagaland Police-i asür Toshi Wungtung nem tetushi agüja gun salute ajanga guard of honour agiba angur.

Dimapur, July 3, 2021 (TYO): July 3, 2021 nü Nagaland sorkari IPR, SCERT & VG Advisor Toshi Wungtung nem State Funeral agütsüogo.

Asür Toshi Wungtung ya July 1, 2021 anogo Delhi nung asü aser pa indang mang yashi Dimapur-i bener aru. Tanep Purana bazaar, Dimapur nung tetsü'er kidang pa den asüpila sentep sentongji agi.

Pa den asüpila sentep sentong nung mendenji Principal Secretary Home, Abhijit Sinha, IAS liasü aser State Chaplain, Rev. T.W. Yamyap-i Tsüngrem o jembisaka aser sentong tembanga sarasadem.

Nagaland Legislative Assembly tenung nungi NLA Speaker, Sharingain Longkumer-i o jembidang "Asür Toshi anojungi asüba atema temolung raksar aser aksar" ta ashi.

Paisa asürü toktsür aoba kinungtsü, tetsü aser kinungertem den mangyim tejashi lemsatepba metetdaksü.

"Asür Toshi ya sempet aika aliba nübo ka liasü. Pai Naga Students Union Delhi nung President inyak, NSF nung tongti shilem agi, University of Texas USA, NEPED den tesentaktep tajung liasü aser UNICEF State co-ordinator for HIV/ AIDS inyak" ta Speaker Sharingain-ia ashi.

AKM-i state sorkar dang Nagaland li kumzüka ayutsü nenshir Assam den angatetteptsü aser arrtsülen Village Guards ayutsü akhanger

Dimapur, July 3, 2021 (TYO): Ao Kaketshir Mungdang (AKM)-i Nagaland Chief Minister dang Assam-Nagaland arrtsü anasa tensa majungba osang den arrtsülen mapa kar inyaktsü atema shidi ka züluogo.

"Akhidang nungi asenoki senmanga aruba ali kumzüka ayutsü atema state sorkari Assam sorkar den ken o ajak angatetteptsü atema olemteptsüla" ta AKM Tir, Nungdokyangar Ao aser Tongti Tezülur, Nekmi Longkumer nati shidi nung shia lir.

Tsurang Valley, Mokokchung nung tawa Assam police-i nija farm ka atsünga agi aser tesseptem amenokba sülen police aika mapa lemsükja lir. Assam Police-i iba ama tashiyim mapa ya kechi atema inyak'ar osang kecha mali. Anungji, state sorkari

Asür Toshi-isa ENPO atema spokesman aser General Secretary inyak aser ano MHA, GOI o ENPO tsüngda olemtep nung züngsem ka ama shilem agiogo, ta paisa metetdaksü.

"GON, GOI aser Myanmar tsüngda international border pillars aser survey maparen nunga pai shilem agiogo. Paisa Saramati mountain aser arrtsülen arem shiruru kumzüka ayutsü dak sendakba mapa kanga inyak" ta NLA Speaker-isa ashi.

"Asür Toshi ya kanga dang teyakyak aser Naga nung asoshi lennir tajung ka liasü. Pai Naga nung aser talisa Eastern Nagaland atema shilem tulu agiba teti bilemtetsü" ta Leader of Opposition, T.R. Zeliang-ia ashi.

"Asür Toshi-i Frontier Nagaland renloktsü atema anibelem jenti arema inyakogo" ta PDA Convenor aser NDPP President, Chingwang Konyak-ia ashi.

Sentong nung Eastern Nagaland Legislators' Union (ENLU) tenung nung H&FW, Minister Pangnyu Phom-i o jembisaka.

"Asür Toshi ya ENLU nung secretary general teinyakdak nung asü. Pai akümüli toktsür aoba ya Naga nung aser talisa Eastern Nagaland atema kanga takoksa ulura lir" ta Minister Pangnyu-ia ashi.

Asür kinungtsü Wt. Lipokla-ia o jembidang tena 2006 kum kibong akümba aser tena tsüngda tesentaktep akangakanga aliba den kati dak dak temolung lemtepa aruba indang ashi.

Asür Toshi ji kanga dang shisa taka nisung ka liasü aser pa kinungtsü asütsü tia ajuruba ya maongka ka ama züngshir, ta laisa ashi.

"Kü kinungboji Tsüngrem tsübuba nisung ka liasü aser pai taintem kanga akhümtüsü aser teti kinungertem aser adianu den tesentaktep tajung ayu. Nagaland sorkari pa nem tetushi agüja State funeral ayonga agiba aser iba sentong nung adentsü arur ajak dang pelar" ta Wt. Lipokla-isa ashi.

Sentong nungsa IPS Retd I. Toshitsubgba Aier, tedi Dokuu Kecham, ENPO, Advisor ENPO, Yimchunger Union Dimapur nungertemia o jembisaka.

Yimchunger Students Union Dimapur-ia state sorkar dang asür Toshi-i Yimchunger nung atema district balaka kumtetsü tebilemba agüja alibatem agizüktsü atema mepishia metetdaksü.

Asür Toshi Wungtung den state funeral agiba sülen pa mang Dimapur Airport-i bener oa Helicopter nung enoker pa tasoyim nung sentong ka agia aremtsü atema bener ao.

ta AKM-isa ashi.

"State sorkari Foothill Road nung yaritepba atema pelar, ajisüaka kum aika süika iba lenmang meyangluzük lir. Nagaland Foothill Road yangluba ya pungmang ka asangsang akümba asütsü aser iba ajanga Naga nung ajanzüktsü. Anungji state sorkari iba lenmang tekaratiba nung yangluzüktsü atema yariteptsü amanger" ta AKM-isa metetdaksüogo.

Assam-Nagaland tsüngda arrtsü mangatettep ken o tem mapang shia adoker. Iba teblemstü ya state nguli nungi ajurua arur aser kumtem süia arundang state ana tsüngda tenangzükteptem agiaka, Assam aser Nagaland tsüngda tesentaktep tajung meyetetsüsa tensatem ajurua arur, ta parnokisa ashi.

DIMAPUR AO BAPTIST AROGO PRAYER & HEALING MINISTRY AJANGA TSÜNGREM NUNGI COVID WARA MADAK TANEPTSÜ MESHIA SARASADEMTSÜ AMANGBAPUR AJAK AYONGZÜKER :

2nd-4th July 2021, Aonung asem (three nights) 8: 00 pm shitak nung II Putipuyang 6:28-30 tashi ner kidang züngang aser temulunger ajaki kimai alua teka mekanga Tsüngrem dang wara agienjang ta sarasademdi. Ashiko Kibubai asenok dang taochitsü sayutsü ta amanger.

Sd/-

Kibubar Mapa nung,
Rev. Kika Jamir, DABA

RPP-i osangbener den sensaksem sentong ayonga agi



Dimapur, Chiteni/July 3 (TYO): Tawa Nagaland nung tentetba Rising People's Party (RPP)-i July 3 nü osangbenertem den sensaksem sentong ka ayongzüka agiogo. Iba political party yagi nüjiso aser democracy atema nokdaker aser yimden yimsüsüba nung inyakyim shidak benoktsü aser electoral revolution ka bener arua Nagaland tasen küma yanglushitsü meranger.

RPP ya Election Commission of India (ECI)-i June 6 nü agizükogo aser registered party ka kumogo.

Osangbenertem den sensaksemba mapang party tir Joel Naga-i, state nung sorkar inyakyim meshidakba ajanga Naga nungertemi temulung masüba ola adokba aser ochi mashi inyakyim anema

nokdakba dak ajemkdaker party inyakyim amenokogo. Lokti nung tebandang aliba ajanga party ya temai adok aser shidakba temelenshia ka atema Naga nungertem yongyaba atema party nokdaksü, ta ashi.

Tanga political party temi nüburtem nem inyakyim tajung magütsütet, anungji inyakyim nung timtem aliba bentettsü atema asenok ajak dak keta lir ta angateta mulung ajemertem longjemer iba party tentet, ta RPP-i ashi.

Bureaucracy independence tanaben amenokshia state machinery indang engine ama bureaucracy dak tamang katetdaksütsü ya party nukjidong tongtibangtiba lir.

RPP-isa, putu tasenba nem tashi agütsütsü atema mapang tongogo. Nagaland yanglushitsü

atema timla agütsüba nukla aser yimden yimsüsüba tsütsü tebilemdanga tasen ka Naga nungertemi langa lir, ta ashi.

Nüburtemi temelenshia ka asoshi akhangba dak ajemdaker party tentetogo. Party-i ajak anisemer state terenlok asoshi inyaksü.

Tir-isa, tejakleni aotsü atema asenok ajak aibelentem lepa repringshitsü aser tebilemstü tem bentettsü asoshi longjemer inyaksü nungdaker ta party-i amanger, ta ashi.

Nagaland tasenba ka asoshi nüburtemi inyaksangshiba nung party-i political party ka ama shilem agitsü aser tulusang tashi aser taochi nung nüburtem tenzüksü, ta ashiba den 2023 küm Assembly elections nung party-i candidate yoktsü ta Joel-i ashi.

NSCW-i tetsürtem kümzüka toktsütsü ayongzük

Dimapur, Chiteni/July 3 (TYO): Nagaland State Commission for Women (NSCW)-i lisopur ajak dang tetsürtem kümzüka aser parnok meraket wazüka toktsütsü mepeshia metetdaksüogo.

NSCW mendenbula Khrienuo Tachu-i, tetsürtem anema inyakba aser talisa kidang tetsürtem mejungi amshiba, sexual harassment aser mental violence aika küma odar aser talisa wara pokteter aliba mapang state nung ibala tatalokba tali küma odar, ta ashi. Commission-isa, Nagaland kübok district balala nung Sakhi One Stop Centres (OSCs), Women Organisations/Hohos asre Women Cell tem den parnok kanga maziingi inyakdar, ta metetdaksü.

Commission-i, asen lokti nunga tetsütem gang-rape asüba osang angazüka kanga

aoksaba lemsatepba den iba amala inyakyim aitsüogo. Ozüing benoka benshiba lokti tentettem den aibelenertem nem temerenshi tesashi aser non-bailable warrant agütsüdkaksütsü atema jenjang tapet agidar, ta ashiba den tetsür chanu aser tetsürtem dak sendakba nung tebilemdangba melenshitsu asoshi ayongzük. Tetsürtem anema maparen balala inyakba sülen taitsüba olen lemsatepba dang masü lokti ka nung tetsürtem tia jenjang ajak nung kümzüka toktsütsü asoshi jenjang tapet agitsü nungdaker, ta kasa sangdong ajanga lemsatep.

State adena orr okadak ken o bentetba ajanga Naga nungertem taoba mapang dang nungi tali yirutsür, kechiyong iba ajanga tarutsü nung tetsürtem tekümzüka makai kümdaksür, ta ashi.

NSCW-i ashiba agi, 2020 küm state-i meyipa arurtem aahyanga chiyonga alitsü atema yimti balalai tanaben meyipaogo aser parnok talitsü majungba kitem nung aliba ajanga aiben lendongi aier aser yamaji 2020 küm ama parnok dak tashiyim benshiba, sensak tia ajuruba aser teyari meshia tongtepratepba ano aika kümdar.

NSCW-isa, state adena orr aliba Naga nung kaketshir loktitentet, pastor aser tanga loktitentetem tali tajungba sendaktepa alitsü mepeshia metetdaksüogo, kechiyong parnok ya Nagaland nung aliba kibongtem atema kanga senti kümogo. Maneni jongdak mapang NSCW-i state adena orr aliba stakeholder ajak den tongtepratepba den parnok nungi teyari agia arudar, ta kasa sangdong ajanga metetdaksü.

Dr. Sazo-i Gurugram nung Garo nung ana asüba aitsü

Kohima, Chiteni/July 3 (TYO): Taoba Nagaland Assembly Speaker aser Opposition NPF MLA, Dr. Chotisuh Sazo-i, Haryana nung Garo nung ana tamamangtsüka asüba aser shilu dak ajemdaker mezüingmeshia amshiba aitsüogo.

NPF MLA-i, asür Rosy Sangma shiba Nagaland nungi lir, la ALFAA Hospital, Gurugram, Haryana nung June 24 nü ice-cream achiba sülen asü aser Nagaland nungisa lar kinunger asür Samuel Sangma, tasüingnü Gurugram nung pa anenzüka aliba hotel nung temang nung tarak keter soseta sür lia ngutet, ta ashi.

Video ka aser voice recording nung mozüki nung staff temi la jung anepalu masüba indang

lemsatepba nung asür Samuel-i ashiba agi, Rosy ya mozükidang temang anepalu liasü aser hospital staff temi agütsüba ice-cream ka achiba sülen la ajungbena asü. Iba video ya social media sabang balala nung ayimsünga prokshio.

Rosy nem ice-cream agütsüba atema ashishiba sülen hospital staff temi Samuel dak teka sangshia liasü. Iba sülen pa mozükidang la den ajuruteptsü atema memela. Tasüingnü Gurugram nung pa anenzüka aliba hotel nung temang sünga tarak keter soseta sür lia ngutet.

Dr. Sazo-i, North East nung aliba state sorkartem dang, party sendoka toktsür mainland India nung North East nungi nüburtem

mezüingmeshia amshiba atema dang masü saka Nagaland nungi Garo nung senso ana tamamangtsüka asüba bushitsüngdangtsü asoshi akhangtsü ayongzükogo. Memenoi ochi obendang agütsüsüla, ta pai ashi.

"North East nung dak rangloker iba amala meimchir dak mebenshitsu inyakba atema asenok ajem ajema malitsüla. Tanü Nagaland nungi nisung ana dak iba ya atalokogo, ashiko asüingbo North East nungi senso mashi ka dak ataloktsü akok," ta pai ashi.

Shilu dak ajemdaker nüburtem mezüingmeshia amshiba ya teti atema anendaksütsü asoshi raratsüla, ta pai shisem.

Tagizüker maliba tasü mang ka Civil Hospital Morgue nung lir

Dimapur, Chiteni/July 3 (TYO): June 27 nü train agi yirutsüba sülen Assam, Karimganj P/S kübok Tinkary yimtsüng alir Rosho Rajer jabaso arishi küm23 tain Kanish Namashutry, private mozüki ka nung temang anepalu aliba 02/

07/2021 nü süogo. Pa tasü mang ya post mortem atema District Civil Hospital Morgue-i benerogo, ta Addl. Dy. Commissioner of Police (Crime) aser PRO, Dimapur-i sangdong ka ajanga metetdaksü.

DoSE-i Special Admission Drive ka ayongzük

Dimapur, Chiteni/July 3 (TYO): Department of School Education-i sangdong ka ajanga, 2020 küm COVID-19 poktetba ajanga kaketshirtem school toktsüba tali kümdar, anungji iba tebilemstü bentettsü atema department-i, class ajak asoshi admission agitsü August 13, 2021 tashi atsülangtsüogo aser kasa mapang nung July 5 nungi August 13 tashi Special Admission Drive ka ayongzük agitsü ta metetdaksü.

Maneni department-isa, school tekolaktem dang tesayur/NGO/kaketshir lokti tentet/ Arogo lenirtem teyari agia school toktsür aliba

tsürapur/guardian tem den tongtepratepa pei chirnurtem tanaben admission agishija school züingdaksütsü atema ajungshitsü metetdaksüogo.

Department-isa, nüburtem dang iba sentong nongita yaritsü aser teka amteper inyaksü mepeshia metetdaksüogo.

Lenir/NGO/kaketshir loktitentet/Arogo lenirtem-i school toktsür aliba kaketshir tsürapurtem nem tangazükba agütsütsü aser parnok chirnurtem anatiba sorkar school nung admission agidaktsütsü atema teyari agütsütsü mepeshia metetdaksüogo.

Kohima DC-i vaccine agitsü osang metetdaksü

Dimapur, Chiteni/July 3 (TYO): Deputy Commissioner Kohima, Gregory Thejawelie NCS-i sangdong ka ajanga, Hombarnü, July 5 nü nungi tenzüka temsüa alirtem nem vaccine agütsütsü ta metetdaksüogo.

Temsüa aliba nisungtem shirnok arishiküm 18 tema lir parnoki ID proof sayur vaccine

agitetsü. Vaccine ya hopta asem Hombarnü nungi Hokolbarnü tashi anepdang 10 ako nungi nikongtsütsü 4 ako tashi UPHC Seikhazou aser UPHC Potterlane nung agütsütsü ta metetdaksüogo. Vaccine agiba anogo item tesemtem nung tenung züingoksemteptsü, ta DC-isa metetdaksü.

DoSE-i Online ajanga tetoktepba ayongzük agitsü

Dimapur, Chiteni/July 3 (TYO): Principal Director, Directorate of School Education, Shanavas C, IAS-i sangdong ka ajanga Department of School Education, Nagaland-i, Online Mode tetoktepba ayongzüktsü teletmetba agiba sangdongogo. India nüjiso ngur küm 75 ajanga benjungnung nungtem nung July 1 nungi August 15, 2021 nü tashi kaketshirtem atema jenjang asem (School, District aser State jenjang) nung online ajanga tetoktepba ayongzük agitsü.

Tetoktepbatem:

1. Essay/Creative Writing Competition; Onüktem:
 - * Classes I nungi V: 'Events leading to India's Independence from British Rule and role of various freedom fighters in it'. (Ojang 500)
 - * Classes VI & VII: 'Analysis of India's struggle for Independence - different schools of freedom movement from 1857 to 1947'. (Ojang 800)
2. Innovative Practices Competition: Teküboklen agüja aliba onük tem nung ajemdaker kaketshirtemi inyakba Projects/Models/Activities tem nung Video Presentations.
 - * Classes I nungi V: 'Vision for Future'.
 - * Classes VI & VII: 'Contribution of individuals to nation-building'.

Tetoktepba dak sendakba nung class 1 nungi 7 tashi aliba School tekelokatem (Govt. & Private) ajak dang temalen metetdakja aliba

tetoktepbatem July 7 nungi 20 nü tashi online ajanga ayongzük agitsü aser category ajak nungi School jenjang nung tetokteper tajungtiba asem shimteter July 26 nü tashi nungbo District Education Officers nem agütsütsü tetuyuba agütsüogo.

Iba sülen District Education Officers-i District jenjang nung category ajak nung tetokteper tajungtiba asem shimtsü aser July 31 nü matong tsüingda Google Drive (Link tatsüka lir lemsateptsü) ajanga Directorate of School Education dangi yoktsü.

Category ajak nung state jenjang nung tetokteper tajungtiba asem August 15 nü <https://dosenl.in> and <https://www.facebook.com/DoSENL> ajanga sangdongtsü.

Sempet:

1. School level nung category ajak nung tetokteper tajungtiba asem nem school temi sempet/ kuli kakat agütsütsü aser School Level nung shilem agirtem ajak nem shilem agiba kuli kakat agütsütsü.
2. District Education Officers-i, District Level nung category ajak nung tetokteper tajungtiba asem nem sempet/kuli kakat agütsütsü aser District Level nung shilem agir ajak nem shilem agiba kuli kakat agütsütsü.
3. Directorate of School Education-i State Level nung category ajak nung tetokteper tajungtiba asem nem sempet/ kuli kakat agütsütsü aser state level nung shilem agirtem nem shilem agiba kuli kakat agütsütsü.



Hokolbarnü Assam kübok Silchar nungi Rajdhani Express ka Manipur-i tanü mezüng atema aruba angur. Silchar nung railway ketdangsürtemi passenger train nung amen aser Nagaland den arrtsüa aliba Tamenglong district nung Vangaichungpao station tashi aru. Iba mapang parnoki India wako atsüket aser linük naklu ken aten. Railways Minister-i kobi melii 11 km rail line ya sayatsütsü.

Assam Police-i Mizoram arrtsü anasa tesep amenoker Chief Secretary jenjang nung senden amentsü

Guwahati/Aizawl, July 3, 2021 (Agencies): Assam aser Mizoram tsüngda arrtsü mangatettep tensa mejungu aliba mapang ka nung Assam police-i arrtsülen teseptem amenoker.

SP Ramandeep Dhillon lenistäba kübok iba mapa inyaker ta Special DGP GP Singh-i tenüngsang agüja metetdaksü.

Ajsüaka, Assam-Mizoram arrtsü anasa Assam police-i Mizoram police indang tesep ana raksatsüba sülen tensa ano mejungu kümogo.

Mizoram kübok Kolashib arrtsü anasa Hailakandi district nung ali atsünga agirtem indang tesep raksatsü ta Assam police-i ashir.

Külen, Kolasib Superintendent of police Vanlalfaka Ralte-ibo "iba tesem nung Assam Hailakandi SP aser deputy commissioner nati anir police aika onok ali nung mongzüka lir" ta ashi.

Assam Police-i parnok amaktsü tsübuba agi iba tesem nung alir aluyimertem jena ogo,

ta paisa ashi. Assam-Mizoram arrtsülen tensa süngjemdaksütsü ateam July 9, 2021 Assam o Mizoram chief secretary tem senden ka amentsü.

"Mongulbarnü Aitlang hnar anasa tensa mejungu akümba sülen state ana nungi chief secretary tem senden amentsü" ta Kolasib district deputy commissioner H Lalthlangliana-i ashi.

Sendenji July 9, 2021 nü Delhi nung amentsü.

KNP nung mapa inyaker 2 ket nung güntok tezü angu

Guwahati, July 3, 2021 (Agencies): Honibarnü Kaziranga National Park nung mapa inyaker Home Guard aser forest guard apu aser tena ket nungi güntok tezü ka ngutetogo.

Osang tejangja ka angazükba sülen Bagori forest range Kaziranga National Park divisional forest officer (DFO Ramesh Kumar Gogoi-i anir mita ao.

Iba mapang Forest guard Sonia Orang aser Home Guard Dipen Kumar Nath na apu.

"Staff ana ket nungi Wildlife Trophy (güntok tezü shilem ka) bena aliba dak sendakba nung puogo. Iba atema maneni bushisüngdang südar" ta Kaziranga National Park & Tiger Reserve authority-i Twitter nung metetdaksü.

Osang angazükba agi yaküm tenati national park nung anguba güntok tezü aika ngua ketdangpur nem agütsü saka tenati güntok tezü ka ayu aser ibaji yokdoktsü atema güntok tezü shibelenertem bushitepa aru.

Assam nung Covid19 tenokdangba agütsüba ajanga tenati güntok tezüji meyokteti liasü, ta osang ajangasa ashi.

Tawa tu tena tsüngda mangatettep adok aser iba ajanga miim o ji temai adok aser DFO Ramesh Kumar Gogoi-i anir telok kati tena den güntok tezüji apu.

Iba dak sendakba nung Wildlife Protection Act kübok ken o ka benokogo aser Kaziranga National Park DFO-i bushisüngdang tenzükogo.



Assam kübok Kokrajhar district nung Honibarnü police-i nashi shibelener ka dak injang agi khaloktsüdang yiru. Iba nisung ya Sorangi Chinna ta jangjaogo aser pa Sukhanjhora nung apu saka pai police dang nungi jena aotsü merangba agi injang khaloktsü ta Kokrajhar additional superintendent of police Surjeet Singh Panesar-i ashi.

Myanmar tsür 2 asüba bushisüngdangtsü akhanger

Imphal, July 3, 2021 (Agencies): Myanmar senso ana tepuokdak lia asüba bushisüngdangtsü atema Human Rights Alert (HRA)-i Manipur Human Rights Commission (MHRC) nem takhangba agütsüogo.

Myanmar tsür ana ya refugee 27 den külemi centre ka nung ayu aser iba ya temporary prison ka kümer liasü.

Tenaji arishi küm 46 tain Ma Myint aser 40 tain Mukhai na liasü ta jangjaogo.

"Tanur trok dena Myanmar senso 29 tashi Churachandpur kübok New Lamka nung tepuokdak ayu" ta HRA executive director, Babloo Loitongbam-i ashi.

Parnoki ozüing alema India telungi aitba atema March 31 nü apu. April 7 nü okadak kati parnok ya mitkar yimsüsüba mapang taküm lendongi aitsü

tsübuba agi kulikaket tejangja melii aruba liasü ta shia liasü. Iba sülen Manipur sorkari Prison Act of 1994 kübok iba centre ya temporary prison ta sangoktsür idakji puok.

Sorkari Myanmar nunger 29 ya Imphal kübok jail balala nung ayutsüba sentong liasü. Ajsüaka, parnok balala alitsü tsübuba agi ketdangpurtem dang parnok külemi dang alitsü mepishia liasü.

"Ketdangpurtemi parnok temepishiba agizük saka chiyungtsü aser healthcare kecha magütsüi dang ayu" ta Loitongbam-i ashi.

Local teloktemi parnok nem chiyungtsü agüja arur. May ita tatemlen ka tashi nung parnok shirang aser June 5 nü nisung 9 dak COVID-19 aliba puteta liasü.

Tetsür anaji COVID-19 ajanga asü saka nisung 13 taneptsü angu.



Honibarnü Agartala nung COVID-19 talenba salaba mapang showroom ka nung mapa inyakeritemi süoshitem anepaluba angur. (Agartala, July 3)

Mizoram nung COVID-19 wara tasembuba atema renemer

Aizawl, July 2, 2021 (Agencies): State sorkari Covid-19 wara shilem tasembuba atema renemer, ta Mizoram health minister Dr R. Lalthangliana-i ashi.

COVID-19 atema party tem, NGOs aser arogo külem senden ka amendang health minister Lalthangliana-i Zoram Medical College (ZMC) nung wara tasembuba atema renemshir ta ashi.

Iba senden nung Mizoram chief minister Zoramthanga menden liasü.

ZMC nung yipden 10 aliba paediatric intensive care unit (ICU), yipden 25 aliba neonatal ICU aser ano yipden 10 aliba high dependency unit (HCU) yanglur, ta Lalthangliana-i ashi.

Tanga state tem ama masü Mizoram nung Covid-19 agi shirangertem dak kechi südir süaka 'exit test' agir. Parnok

mozü kidang nungi mesüra Covid-19 care facility nungi anizüktsü atema iba test agir. State nung kiosk COVID-19 Testing Centre 6 lapoka lir aser iba nung taginürtemi vaccine agir.

Mizoram nung ZMC (dedicated Covid-19 hospital) dak alia Dedicated COVID Health Centre (DCHC) 15, COVID Care Centre (CCC) 55, CCC 2 aser Community Covid Care Centre (CCCC) 177 lir.

"Covid wara mapang nisungtem yatzüra meyütsütsü atema sorkari mapa inyaker" ta Food, civil supplies & consumer affairs minister, K. Lalrinliana-ia metetdaksü.

Mizoram nung jang quintals 2,51,136 yua lir aser ano kobi melii metric ton 2,000 talila bener arusemstü, ta pai ashi.



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI (JULY) 04, 2021

Asemtepertem

Alima nung alir asenok ajak ya asemtepertem lir. Ajisüaka, asenok aikati aji memeteti zübazübaa alir. Iba jagi asenok tamang aser maparen aika nung asenokia memeteti tangar aika nem alemtetdaksür aser asenok aika akümüli nung teyangluri lemezüksüba anogo aser mapang agi meperi, alizüng matongdang leper tama tongadoker. Taküm nung tesasatsü tulutibaji aji lir. Ashiko, asenok rongnunga aikati asenok taküm alizüngji leper amai bilema alitsüa akok, saka leper yabo asenoki masemyonga atongtsüba, anungji leper ya asenok akümüli alizüng masü saka asenok nem teyangluri lemezüksüba alizüngjibo leper matongdang, leper jakdang yuja lir. Asenok mapaji iba alizüngji meteta leper matongdangsa alizüngji tama atongtsüsa asenoki asemtsüla. Iba jagiang, Laishiba nung tenyar Paul-i 2 Timoti 4:7 nung, "ni' kanga junga raraogo, ni' alizüng tonga asemogo aser ni junga amangtetogo," ta ashiba asenoki angutsü. Iba Laishiba tekong ya azüngdangang, asenokia Paul ya alima nung rarar, asemteper aser tamanger ka liasü na (?) ta bilema arur. Ibaji kodang bilemdangdir, Paul amaji asenoka alima nung rarar, asemteper aser tamanger lir ta angatetsü. Paul taküm nung makamait, nungsen, tetsübu, reshikangshi, taitüba aser tepuokdak ayuba tensa tia aser mapang aika ajuru. Pa asoshi item tensa tamajungtemji tanüla tongpang liasü. Pai pa taküm piyong anogo shia item tongpangtem den raraa nokdak. Iba ama tatala, makamait timtem aser reshikangshi ajuru tenzükba anogoji pa asoshi tanüla nung tangartem den asemtep tenzükba anogo liasü. Item timtem aser tekangshi mapang ajakji pa atema tamang tendangba mapang liasü. Aji oda, pai kenüa pai pa Saul asüba mapang to nükshia mebilem aser Saul tamaren jenjang toktsüba asoshi mesasa. Ajisüaka, item ajakji pai tesülen toktsür kotak tebu Tsüngremi pa ama tanüla tongpang takok ngua rarar aser amangertem, shirnoki alizüng tonga asemer, parnok nem renemtsüba ochi sempet korangji agizüksü asoshiang yongyaa asem. Asemba tetezü kena animesüngzük aser amajok nung mapang meindoki pa nukla nung Kibubai pa ama junga rarar aser amanger nem renemtsüba ochi sempet korangji dang yur inyak. Aji oda, 2 Timoti 4:8 nung Pauli shia aliba Ochi sempet korang ya noksa yanglur artist tajungibo alima nung junga amangertem asoshi kotak nung renemja akaba korangji nukla dangi arua yanglutettsü. Atangji, asemba nung takokji tetenzükdang tangar ajak dang nungi tama apusetba aser karaa asemteba kija agi masü saka len talang süaka anibelem arema alizüng matong tashi maneni asemba agiang angur. Nisung aikati kanga junga asema tenzükba saka yakta aniadoker aser anener, kar len tom nung yiruadoker aser teimla samar. Israel nungertema Egypt lima nungi Canan limai apusoba anogo to parnok asoshi asemtep tenzükba anogo liasü. Aji oda, karbo temerem tzuim majangdangyongi aniadoker liasü. Tanüa asenok Yisu dak amanger aika atema asenok temulung meyipa Yisuji asen taküm nung kibur ta agizükba anogoji tamang nung asemteptsü tenzükba anogo asütsü. Ano kar asoshi tzu nung tzußenba anogoji asütsüa akok. Ano kar asoshi mapai aiba anogoji asütsüa akok mesüra kar asoshi kibong akümba anogojiang tanüla aser tamang nung asemtep tenzükba anogoji asütsüa akok. Kodang asenoki tenyar Paul-i ashiba alizüng aser kotak nung renemja akaba ochi sempet korangji tanüla nukla nung yur asemtsü tenzükdir, asemaka manitsü, melumitsü aser tongpang tulu nunga tezü matangtsü aser metsübutü. Paul-i asenok dang shinübaji alima nung Tsüngremi mulungba mapa inyaka alibaji ayongayonga tanitebelem memetet aser tetsübu tia majurudang alia ta shinürba masü, saka timtem jenti ajuruogo saka item ajakji koka amangtetogo ta shinür. Ashiko, asenokbo Paul ama masü, temulung meyipli atsüngzuka aoba purtem asütsüa akok, mesüra mapa tajung ka angu nung Tsüngrem amadokba purtem asütsüa akok, mesüra makamait timtem tera ajurunung ochimashi tenzükba purtem asütsüa akok mesüra kibong kümüli balaba purtem asütsüa akok. Atangji, asenoki taküm tongpang nung tasü itta junga merarateter, junga mamangteteter aser alizüng tonga masemtet tom nung anenadoker. Iba jagi asenok aika alima nunga tepela mali jangratema malir aser kotak nung tebu Tsüngremi renemtsüba ochi sempetjia mengujungi samadoker. Ajisüaka, Apijemtsü Shin 24:16 nung ashir, "teindang aser ochishir nisunga tenetben alanger saka tanaben saker saka tamajung purtembo tensa tamajung nung laoadoker," Tetezü, alima nung teindang nisunga aiben aibelener saka meyipa arur saka tamajungerbo tensa tia majung khen ajurudangyongi aibelener aser meyipa marur. Aji oda, asenoka alanger alitsüa akok saka saker alizüng tonga asemba purtem den adentsü merangdi.

OLEMSABANG

KIBONG YANGERBA NUNG TEBU/KINUNGBU KA TEINYAKTSÜ SHILEM

~ L. Kika Pongener

Anung küpok mimchir, shiruru, ozü-sangnü aser taküm aliba/maliba ajunga madak kiburji Tsüngrem, aser mimchiri anir taküm aliba ajungai Tsüngrem dang 'Oba' ta ajar. Yamaji kibong nung tokolak/kiburji 'Tebu' lir, kechiyong kibong ka mesutsüba aser kümzüka ayutsübaji 'Tebu' ka khuret/shilem lir. Anungji Tsüngrem sulenbo alima nung 'Oba' ta ajatsü temsua/langa alibaji 'Tebu' kaji asütsü. Ibayongji, tebu dang kinungtsü anir chirnur ajungai 'Oba' ta ajar. Anungji 'Oba' ta ajaba "Nungja" ya ata-mata ka masü kanga dang jenjang tulu lir, kechiyong iba ya Tsüngrem melena ajaba 'Nungja' lir. Anungji tebutem ajungai 'Oba' ta ajaba 'Nungja' ya pei sasa mezüngmeshi masütsüla. Asenoki laishiba nung tebutem kar indang bushidanga, parnok nungi lesson kar agitsü merangdi. Yob ya tetemjen, teindang, Tsüngrem tsübuba aser temenen sempaba nisung ka liasü. Pa jabaso tenet aser jala asem liasü. Yob'er jabasotemi parnok ki shia pei ataba anogo nung benjong yanglu, aser parnok den chia ajemtsü asoshi parnok tenu tetsürtem aja. Ajiser, kodang parnok benjong anogoji atem, Yob-i parnok ja-a meshitetsü, aser anogo shia anepongi saaka parnok ajak asoshi tarungba tenla ka-ka agütsü. Kechiyong Yob-i bilem, ashiko ozü chirtemi temenen menaogo sudi. Idagi, Yob taküm nungi asenoki lesson tajung ka angubaji, "Yob ya pei jabaso-jala atema khuret abenba tebu ka liasü" ta lesson angur. Ano tejen lai nungjisa züngdangra, Noah par putu nung Tsüngremi temulung achitsüsa/tamang katettsüsa, temenen nungi pila-a taküm litetba nisung ka liasü. Noah-i Tsüngremi ashiba anga-a 'Rong' yangluba ajanga par kibong nung alir ajunga Tzümetsüng lendong nungi kümzük. Noah taküm nungi lesson ka angubaji, "Kibong ajunga kümzüksüsa ketdangsa asa-meyangtetba tebu ka" ta lesson angur. Ano tejen lai nungjisa züngdangra, Eli Putir-i tebu ka ama par chirnur mazüoktet, par jabaso Hobni aser Finehas, tenati tenladak sababangi tenla bener aruba chiyungtsü rakzüka achi aser tenladak sabang nung inyaker tetsürtem den nukdapangta beshi. Ajisüaka, Eli putir-i par jabaso ana mazüok pei sunutsü sudaktsü. Eli putir taküm nungi, "Tebu kati pei teinyaktsü tim meinyaktet, chirnur mazüoktet, pei mapa nung tamakok anguba tebu ka"... ta lesson angur. Ano tejen lai nungjisa züngra, Dawid chubai par sepoy ka, Het nunger Uria tongpang nung tepsetdaksür, pa kinungtsüji rakzüka agi. Anungji iba temenen taa, Dawid'er kibong nung par jabaso Amnon-i pei tenu Tamar den nukdapangta beshi, aser iba mechi Absolom-i tenu Amnon tepset. Dawid-i par sepoy Uria tepset, saka par kibong nungbo tedi-i tenu tepset. Dawid-i Uria kinungtsü rakzüka agi, iba temenen taa, par kibong nung adianu-aiyanu tsüngda nukdapangta beshia maaksu mapa tulu-ka atalok.

Aji oda, tanü putu nunga, Eli putir ama tebu kati pei teinyaktsü tim meinyaktetba tebutem aika lir, ibajagi kibong nung tebilemtepsü khuret tulu bentsür arua kibong aika timtem tia nung lir. Kibong karbo kaa-ita jenjang tajung nung lia aliba, chirnur timi mazüoktetba ajanga, chirnur-i bentsür aruba khuret agi kibong temeimtsü-ka timtema aliba aika lir. Ano Dawid chuba ama chirnur tim lenmang nung sayua anitettsü melena, pei sasa tebu ka akümüket jenjang mezüngmeshiba tebutem aika lir. Tanü asen Naga nunger kibong aika nung tebutem aika Dawid chuba ama, pei sasa 'Oba' ta ajaba jenjang malangzükter, yi lar/mozü lar kümer taküm lisaba, lottery/Dash asayaba nung rongsen aser mapang endokba, nukdapangta japojariba nung rongsen aser mapang endokba, chirnur atema khuret abentsü melena, meyiper chirnur nem-ang khuret benloktsüba tebutem aika lir. Tebudi kati pei chirnur den tesendaktep mali, sayu-bentsü maka, sensaksem mali, tajungshitep kecha mekai aliba, (communication cap), chirnurtemi tebu ajurutsübaji Molosongzü/Kiyi tesashi ka ajurutsü ama tsübuba tebutem aika lir. Tanü putu nung, osang-tsüsang (Mass-media) balala nung kinungtsür karbo tetla-tetshia/maksudakja, pei kinungburi, mesura adianu/kinungeri jentokba/sentokba otsü/osang adokba aika azünger. Ajisüaka, itum ajungaji telung tashi lua jungjunga bushidanga ora, ajakbo kinungtsür kija tai masü, karbo tebu/kinungbu kati pei tim teinyaktsü khuret mabenba, kibong senzuka toktsüba, pei apuani aser chirnur kechi jenjang nung lidar memetet, kinungtsü nem kibong khuret ajunga benzuka toktsüba agi, chirnur School/College fee agütsüdang, kibong achaayanga ketdang asüdang, sentsüh aika attsütsüsa akümba, ajisüaka, ibalaji kecha meshisadangi, mesenmetoa, 'Social Media' balala nung maaksudakja/tetla-tetshia adoktsüba, mesura balazuka yokba aika denjia arudagi. Ashiko, kibong khuret ajungaji kinungtsü kija nem benzuka metoktsüi, tebudi ka ama pei teinyaktsü tim shitak inyak asübo, kibong iba tia jagi maitsüba liasü. Kibong aika nung kinungtsür-i kinungbui memeteti sen merijang/lakh aika sentsüh atsühba, kinungbui memeteti kimong-lumong 'Patta' tashi senotsü apohtepba nung 'Mortgaged' asüba, itum ajungaji jungjunga shisadangra... ajakbo kinungtsü kija tai masü...Kodaser sobaliba dak aketba ama, tebur ka ser kimong-lumong dak sentakba zülubanglo/kaket pei sasa ketdang mesutet (?) Kodaser tebu ka ser kibong khuret mebenteter (?) Kechiba tebu ka ser pei kibong/chirnur sentoker (?) Surabangla tebu-ia pa teinyaktsü tim meinyak aser tetsü-ia meinyakra, chirnurtemji kechi tia-i aitsü...??? Ibajagi tetsü/kinungtsü jagi kibong khuret ajungaji abentsüsa akümer, saka idangji tip külen nungibo, kinungbur mezüngshi-i ajembanga inyak amai kümadoker. Aji oda, arok-aroka shisadangra, tebu/kinungbu kati pei khuret mabenba/makokba agi kibong sensak tia-i ayir. Atangji, tebu/kinungbu kati pei kibong sentokba agi kibong teimba ka sensak tia-i ayir. Hau... kibong ajakbo takar masütsü, saka shirnoki azümesen mesui mapa meranga inyaker, chirnur shitak azüoka tim lenmang nung aniteteter, rongsen timyimi ketdang asür, parnok-jibo kangarabo tim-medemi, pei kibong sasep peria chiyunga-jema liteter. Anungji tebutem/kinungbutem ajaki 'Oba' ta ajaba 'Nungja'-ji konang dang masü khuret tulu lir ta angateta, kinungtsür nem dang shiloka/benzuka metoktsüi kibong khuret abentsüla. Koba kibong nung tebudi kati pei khuret mebentetlir, iba kibongji 'Rong' ka rongitsü (rudder) maliba ajanga züyüm telung nung asongokba ama kibongji aiatai tia-i aitsü. Atangji kibong ka yangerba nung tebu ka shilemji kanga dang tulu lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Canada Day- July 1 nü Alberta nung Tenla ki 10 raksatsü



Canada nung aliba Tenla ki ka nung rong tepsatsüba den kürakyanglu ka raksaja aliba noksa nung angur.

July 03, 2021: July 01, 2021 nü Canada Day nü Alberta nung Tenla ki ter raksatsüogo, aser iba ya akhidang lisopurtem nem tim temeden magütsüba agi tejashi nung raksatsüba asütsüa akok, ta police-i metetdaksüogo.

Iba province kübok Calgary yimti nung Tenla kitem nung rong temerem aser temeremso tepsatsü aser o balala zülua toktsü.

Canada nung akhidang Arogoi ketdangsüba residential school tem nung lisopur tanurtem aika zünga liasü, aser item school temeket nung tasü mang jenti aremba leper aika anguba sülen lisopurtemi Arogo dang jashir.

Leper aika anguba sülen telok karibo July 1 nü Canada Day amongtsü aliba sentong thinentüsü, ta takhangba agüja liasü.

Alberta nung tongti

ketdangser, Jason Kenney-i, mejangjaba nisungtemi raksatsüba Tenla kitem rongnung Calgary yimti nung aliba African Evangelical Church Tenla ki densema lir, ta ashi. Iba Arogo nung züngsemtem timbaka linük balala nungi jena aruba refugee tem lir.

"Parnoki Canada nungbo sadoksadoka Tsüngrem külemtetsü, ta amanga Canada-i arua liasü," ta Kenney-i twitter ajanga metetdaksü.

Calgary Police-i ashiba agi, Bodhbar aonung nungi Brihostibar anepdang züngia tashi nung Tenla kitem raksatsü.

Tenla ki ka nungbo züngya "215" zülua liasü, aser bushisü ngdangertemi iba züngya ya Canada nung residential school system den sendaktepa lir, ta bilemer.

May ita nung Canada kübok British Columbia nung

residential school tulutiba nung lisopur tanur 215 tasü mang aremba leper ka anguba sülen sülen maneni Canada nungsa Catholic residential school ka nung nisung 752 aremba osang jangjaogo.

Item leper anguba sülen taoba ita western province nung Catholic Arogo Tenla ki aika rongdokja liasü.

Residential School ya 1890 nungi 1969 küm tsü ngda lapok. Iba mapang nungji federal sorkari Catholic Arogo dang nungi iba school meshizüka ketdangsüba sülen 1978 küm shibanga liasü.

Aso 19buba mapang nungi tenzüka 1970s tashi nung Canada nung First Nations tanur 150,000 shi kangshia linüki yariba Khristan school tem nung zü ngdaksü. Iba mapang nungji school tem nung tanurtem dak tim mesüi benshiba tatalokba aika liasü.

July 3 nü tang mezü ng Indian Christian Day ayongzüka among



Indore (Madhya Pradesh), July 03 (Agencies): India nung Khristan denomination balalai tang mezü ng July 3 nü Indian Christian Day ayongzüka amongtsü, ta sangdonga liasü.

Indore nunga tongti putir, Dr Chacko-i, "Akhidang nungi alima nung India nung 'spices' chiyungtsü ya kanga nungtugu liasü. India nung shishilembartemi tziyüm ajanga anüolen linüktemi oa shishilemba, aser tangalen nungia shishilembartem India-i arua liasü. 52 AD nung shishilembar ka tenü ng agi, Habban den külemi Saint Thomas (Yisu nütsü ng Thoma) Kerala nung aliba Malabar coast tonga aru. Chubai pa agizük, aser iba mapang nungjagi tenzüka India nung

Khristan yimsü prok tenzüka liasü," ta metetdaksü.

Iba sülen Thomas Tamil Nadu-i ao aser yangji pai Khristan yimsü prok, ibayongji 72 AD nung pa Chennai anasa tepseta liasü.

"Iba mapang nungjagi tenzüka India nung Khristantemi Saint Thomas ya parnok atema ain kar ta zü ngshir. Küm 2000 tejaklen Khristan yimsü tenzüka liasü," ta Chacko-i ashi.

Indore Catholic Arogo nung otongdar, Babu Joseph-i, "Khristan yimsü atema Aso 21buba ya kanga tongtibang, kechiyong küm 2000 tejaklen Yisu Khrista meimchir ama alimai aru," ta ashi.

Anungji 2021 küm nungi tenzüka 2030 küm tashi Khristantemi küm ter

benjungteptsü, ta metetdaksa Joseph-i, "Tesüiba küm 2000 tsü ngda India nung putiotsü nung Khristan yimsü ya tongti shilem ka lir," ta ashi.

Honibarnü India tesem ajaklen Tenla kitem nung Khristantemi sarasadema mongogo.

North East India nunga state ti nungi Khristan lenirtemi Coordination Committee ka tenteta iba anogomong ayongzüka mongogo.

Parnoki sangdong ka ajanga, "Indian Christian Day amongba nü kjidong ya 52 AD nung St. Thomas-i India-i Kibur Yisu Khrista osangtajung bener arua sangdongba atema benjungteptsü asoshi lir. Thomas ya Yisu nütsü ng 12 rongnung ka lir," ta metetdaksü.

July 3 nü iba anogomong nung agiba sentongtem regional, national aser global level nung sabang balala ajanga live-stream süogo.

North East India nunga iba anogomong sentong ya nikongdang 3:30 ako nungi 5:00 ako tashi agi aser national level sentong nikongdang 6:00 ako nungi agi.

ANO GO ABEN TSÜNGREM DEN

MEJANGJABA TANELATEM

"Temeimbatem, nenoki tanela ajak dak tamang, saka tanelatem Tsüngrem nungi asü masü parnok tendangang; kechiaser tiyazü ain kar jenti alima nung adokogo" (1 Yn. 4:1).

Asentenshiba mapang arogo otsü nung memetetba mi jenti ajangshia aruogo. Mezü ng tenyartemi iba mi asoshi tekümdangtsü shia aru. Kümdanga alitsü ashiba tetezü renema alitsü ashiba lir. Iba kuli nung ajemdaker parnoki sayutsü ngi masüba tangar Yisu, tangar osangtajung aser tangar tanela Tsüngrem anema sayutsü ngiba anema tekümdangtsü ashi (2 Kor. 11:4).

Tsüngrem tenzü kertem dang nungi tiyazü tenzüker aser tiyazü tesayur timba liasü. Iba indang aika nung amshiba angur. 1 Yn. 2:18; 41; Mt. 7:15, 22, 25:5; 2 Kor. 2:17; Fil. 3:18. Au, tsükchirtemji tziümetsü ng ama arur (Isa. 59:19). Tiyazü tenzü kba mapa melen Yisui, "tsü nglu" "tziümetsü ng" aser "mopung" ta jembu (Mt. 7:15, 25). Pauli tiyazü tesayuba mopung agi minzütsü ta jembu (Ef. 4:14). Tanelatemi Tasen Lai arogo nung mashi tenzüker kar ajanga tenzü ktsü akok (Ef. 4:11). 2 Korint 11:13 nung asenoki tiyazü tenyartem indang azünger. Tiyazü ain kartem (Mt. 7:15), tiyazü sayutsü ngirtem (Gal. 1:6-8), tiyazü sannükertem (Yn. 10:12) aser tiyazü tesayurtem (2 Peter 2:1). Tatem anogo tonga arudang, tiyazü tanelatemi mapa tali inyaktü. Iba indang Tanela Temeshi ajanga shin (1 Tim. 4:1). Mekümdangba tamangertem tamang nung pilatsü. Ibai ajungben pilaba masü saka mera ka sülen mera ka apunger aotsü.

Tenyartem ajaki tanela balala agi inyakba sayutsü ngirtem anema kümdangdaksür. Item indang Pauli amshiba otemji repringang. Tekülak inyakertem (2 Kor. 11:13), timtemdaksür (Gal. 1:7), tiyazü adianutem (Gal. 2:4), mashileni odaksür (Gal. 3:1), azütem, tamajung inyakertem (Fil. 3:2), kangki tsükchirtem (Fil. 3:18), tekelakodaksür, amajok mapa (Kol. 2:4,8), mezümekümer (Kol. 2:8), anemsü (2 Tim. 2:16), asüküm nisung (2 Tim. 6:4), teraksa (2 Tim. 6:5), mojing sang nung apurtem (2 Tim. 2:26), temeyipoktsürtem (2 Tim. 3:13), amajok O jembirtem (Tit. 1:10), tim masüba sayurtem (Tit. 1:11), telemsateper (Tit. 3:10).

Tanü tesayuba balala aika Arogo nung adoker. Tanü Arogo, Khrista Temang asoshi tongtipangtiba sempetji, "Tangatetba Tanela" nü ngdaker. Item indang asenoki anogo pezü pungu ka repringtsü.

Sempet tajung aika agütsü sang Kotak Obala, tanela tajung, tamajung angatetsü sempet kü nem kua. Amen.

Sri Lanka nung EPDP zü ngsemtemi pastor Jeyaroopan dak azük



Pastor, Thanabalasingam Jeyaroopan, Vavuniya Public Hospital nung amongba noksa nung angu

July 03, 2021: Sri Lanka nung Vavuniya kübok Poonthottam area nung Eelam People's Democratic Party (EPDP) zü ngsemtemi pastor aser par kibong dak aiben azük.

Bodhbar aonung (June 30) Parliament zü ngsem, Dileepan pusemertem aser EPDP zü ngsem 9-i pastor, Thanabalasingam Jeyaroopan aser pa kinü ngtsü na dak azük; iba tesem nungi police-a liasü saka police-i odang toktsü.

Bodhbar aonung pastor dak azükba sülen Brihostibarnü pastor Jeyaroopan-i Police Station nung ken o ka benokogo.

Brihostibarnü pai osangbenertem den jembiba sülen iba anogo nungjisa anepdang 10:00 ako meta parnoki pastor dak azük.

Taküm küm tetenzüklen UK International Human Rights Ambassador, Rita French-i Sri Lanka nung Khristantem densema minorities reshikangshiba atema tebilemstü

onük lemsatepa liasü.

Pastor-i ashiba agi, parnoki pa dak azükba mapang nungji police-i kecha mashi saka parnok ang pusema liasü.

Paisa, pai police station nung ken o benokyonga aibelenertem anema bushisü ngdang masür, anungji police-i aibelenertem den senteper tangatetep nung par kibong anema inyaker asütsüa akok, ta ashi.

Pastor-i police dang iba tatalokba jungjunga bushisü ngdangtsüla aser tekaraba nung aibelenertem aputsüla, ta mepishiogo.

Iba sülen-a EPDP zü ngsemtemi pastor kidangi aruba sülen pa dak mejungi azük, aser tang pa

Vavuniya Public Hospital nung mongdar.

Hospital nung osangbener den jembidang pastor-i, Deputy Commissioner of Police-i iba tatalokba bushisü ngdangtsü aser aibelenertem aputsü ta shiogo, ta metetdaksü.

OLONG PAITEP # 5864

1			2			3			4	
			5		6		7			
8										
			9							
	10									
									11	12
			13				14			
15						16				

TIPILEN		LANGTSÜNGLEN	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang		10. Tetsüng tajemtdak	- (6)
tongtonglatsü atu	- (5)	12. ___ adenshi	- (4)
15. Tejen lai nung tesayur	- (5)	14. Tsünösenbongtsü adokdak	- (3)
16. Tsüngsak-mopung	- (5)		

OLONG PAITEP # 5863 TELANGZÜBA

TIPILEN :	LANGTSÜNGLEN :
1. Kasa, 6. Rangben, 7. Mait,	1. Khu, 2. Süjak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Ratet, 7. Mozü, 8. Ita,
17. Rajang, 20. Lanu, 24. Nüngjem,	10. Tar, 12. Tinu, 14. Salem, 15. Aja,
25. Süra.	18. Anünü, 19. Tajü, 21. Ano, 22. Onü,
	23. Kua.

KOMA SÜLA TELANGZÜBA

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?

Takoktsü lenmang lira, mesüra inyakyim nung aibelen melira, "Community Health Centre" dang nungi temaba jenjang tashi lapoktsü atema ABAM-i lenmang bushitepa inyaknung ajungtsü.

- L. Kika Pongener.

Impur hospital Community sub centre ka ama akümstüji takoktsü. India nung city nungtuko tem nung medical colleges aser hospitals teimbaka Christiantemi/ Churchestemi lapokba lir. ABAM aser Ao Arogo tem nung rongsen peria lir. 2020 aser 2021 küm ana, ABAM aser Local Arogo staff travelling allowances, ano trainings, seminars, meetings, etc, etc, cancelled süogo, item nungi anüngzüka alitsü. Ano, Covid 19 nem teyari agütsütepba ama Ao Arogo takartemi lakh ka ka/ anana/ pungungu agütsüra takoktsü. Kechi mapa südir süaka ochi shia, nendaka aser melungsoa inyakra ajak takoktsü.

-Dr. I. Asongla Pongen.

Kanga dang jungla kechisaer iba Hospital ya Nagaland nung aliba Hospital rongnung tejentiba ka lir, saka ya govt meyong masü nungji junga run mesüteter. Anungji ABAM kisüngi mesüi Arogotemia yaritepa Community Health Centre jenjang tashi kuma ajungket nung talisa Ao kin atema kanga jungla ta tebilemba ka shidanger.

-T Ao, Mkg

TANÜBO NAI LANGZÜANG

Q. Koba küm European Space Agency tenzük?
A.1975 B.1982 C.1980 D.1985

_____ (Taruba adok nung onoki langzüksü)
YASHI ADOK TELANGZÜBA : 5 Yrs

AO OSHI ANGAZÜKDAK:
TANÜ ANGAZÜKTSÜBA OJANG



Kenü
 (n) anogo ka (one day)
 Kenü anogo ni temulung meyipa taküm melenshi.

Kenünü
 (n) anogo kaka, mapang mapang (one day each, sometime)
 * Kenu künati kübu mapa **kenünü** melentepa inyaksü.

Happy Birthday

TENÜNG - SHISAWATET T KICHU

Tasoba anogo - 4 July
 Küm - 4
 Talidak - Salulamang village

Tsüngremi jabaso tasoba anogo nungi tanü küm pezü anema len ania aru nung Tsüngrem tenüng asanger. Tsüngremi jabaso taküm ano maneni arishi talang moajang ta sarasademtsür

- Temeim Oja, Aba & Kinungertem



NAI-A YA METETTER MA?

INDIA NUNG NÜBURTEMI SAPUA ALIBA GARI KAR: 'June 2021'

1. Maruti Wagon R	19,447	1. MARUTI WAGON R	19,447 UNITS
2. Maruti Swift	17,727	2. MARUTI SWIFT	17,727 UNITS
3. Maruti Baleno	14,701	3. MARUTI BALENO	14,701 UNITS
4. Maruti Vitara Brezza	12,833	4. MARUTI VITARA BREZZA	12,833 UNITS
5. Maruti Dzire	12,639	5. MARUTI DZIRE	12,639 UNITS
6. Maruti Alto	12,513	6. MARUTI ALTO	12,513 UNITS
7. Hyundai Creta	9,941	7. HYUNDAI CRETA	9,941 UNITS
8. Maruti Ertiga	9,920	8. MARUTI ERTIGA	9,920 UNITS
9. Maruti Eeco	9,218	9. MARUTI EECO	9,218 UNITS
10. Hyundai Grand i10 Nios	8,787	10. HYUNDAI GRAND I10 NIOS	8,787 UNITS

SUDOKU # 5904 TELANGZUBA # 5903

		9	6		3	7		5	3	8	1	4	6	2	9	5	7
3		8			5		4		4	9	7	5	8	1	2	6	3
		1			7	3			2	5	6	7	9	3	1	8	4
6			5	8	4	9	1	7	9	7	5	6	2	8	3	4	1
	8		3	9	1		6		6	4	3	1	7	9	8	2	5
9	1	4				8			8	1	2	3	4	5	7	9	6
	3		4		9		2		7	2	4	8	3	6	5	1	9
8	5		1		6				1	6	9	2	5	7	4	3	8
4	9				8	1			5	3	8	9	1	4	6	7	2

OJANG LUTEP # 5449

AKLTEJEN :

ERAS :

SÜLETEN :

ARTANG :

IBAAL :

NGIREPRAME :

ZÜNGALIJI :

TETTONGSÜ :

ANGMERA :

MANASEG :

OJANG LUTEP TELANGZÜBA # 5448

TESEMPATEPER NISUNG ANA TELUNGJEM SAYUA LANGBANG KA NUNG KÜLEMI CHIYONG

TAN HOPTA ATEMA - KOMA SÜLA ?

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?



July 03, 2021 nü Dehradun nung Uttarakhand Chief Minister, TS Rawat-i CM menden nungi sodi meshiba shidi state Angh, Baby Rani Maurya nem agütsüba noksa nung angur.

Sorkar atsüngdokba nung ED aser CBI-i shilem magitsüla: Sanjay Raut

Mumbai, July 03 (Agencies): Hokolbarnü Shiv Sena lenir, Sanjay Raut-i, state sorkartem atsüngdokba nung Enforcement Directorate (ED) aser Central Bureau of Investigation (CBI) nati shilem magitsüla, ta metetdaksü. Hokolbarnü New Delhi nung osangbenertem den jembidang pai, Maharashtra nung kari Maha Vikas Aghadi (MVA) teloktep sorkar akümertem anema inyakkdar, ta metetdaksü. Tang Maharashtra nung Shiv Sena-NCP-Congress teloktep sorkar lir, ajisüaka telung nung mangatettep adoka lir, ta jembiba dak sendakba nung Raut-i, BJP-i sorkar tashi meitdaksütsü meranger, ajisüaka teloktep nung timtem kecha mali, ta ashi. Shiv Sena nungi Rajya Sabha MP, Raut-isa, opposition party-i melung melemtep adokdaksütsü meranger, ajisüaka state Legislative

Assembly Speaker menden atema election nung MVA teloktepi takok angutsü, ta ashi. ED-i Maharashtra nung sugar mill ka (Maharashtra State Cooperative Bank ochimashi ken o) den Deputy Chief Minister Ajit Pawar den sendakteptsüba dak sendakba nung tasüngdangba ka langzüdang Raut-i, MVA teloktep yanglutsü atema shilem agirtem anema inyaker, ta ashi. "Ano maneni yamai (tai tongloktsütsü) ataloktsü. Iba ama politics ya majung. Nisung lakh aika sugar mills nung inyakba agi chiyunga alir. Sorkar anema inyaksü atema ED aser CBI amshir. Sorkartem atsüngdokba nung ED aser CBI-i shilem magitsüla," ta pai ashi. Raut-i ashiba agi, NCP tongti Sharad Pawar aser Congress Tir Sonia Gandhi na tesendaktep junga aliba ama Shiv Sena Tir Uddhav Thackeray aser Sonia

Gandhi nata tesendaktep junga lir. Shiv Sena-ibo, coronavirus wara mapang nung Assembly speaker election magitsüla, ta shiogo. Tang speaker teinyakdak, Nana Patole taküm February ita nung state Congress Tir shimba sülen Speaker menden tazüng adoka liasü. Tzüngluruwa mongpu senden (state legislature) July 5 aser 6 nü agitsü. Tamalen osangbenertem den jembidang state Revenue Minister aser Congress lenir, Balasaheb Thorat-i, assembly senden agiba mapang nung speaker shimtsü, ta metetdakja liasü. Ajisüaka Hokolbarnü Maharashtra Angh, Bhagat Singh Koshyari dangi züluba shidi nungbo Chief Minister Uddhav Thackeray-i speaker election atema anogo-mapang shia mali.

Rafale ken o bushisüngdangtsü atema JPC tentettsüla: Congress

New Delhi, Chiteni/July 03 (Agencies): France-i India nung dang raradang amshiba Rafale tayimtsü 36 ayoktsü atema tezüngzüktep agiba bushisüngdangtsü atema France nung judge ka shimba sülen Honibarnü Congress party otongdar, Randeep Surjewala-i Ato kilonser, Narendra Modi dang Rafale ken o bushisüngdangtsü atema Joint Parliamentary Committee (JPC) ka tentettsüla, ta takhangba agütsüogo.

New Delhi nung osangbenertem den jembidang Congress leniri, "Rafale alizükba nung ochimashi aliba jungkai adokogo. France sorkari iba ken o bushisüngdangtsü tuyuba ajanga Congress party aser Rahul Gandhi-i jembia aruba kuli jangjar," ta metetdaksü. India dang Rafale tayimtsü ayoktsü atema sen crore 59,000 tezüngzüktep agiba nung ochimashi lir, ta tai tonglokja aliba bushisüngdangtsü atema France-i judge ka shimogo. Taküm April ita nung Mediapart report ajanga iba ken o nung ochimashi aliba metetdaksüba aser French NGO Sherpa-ia tashishiba ken o agütsüba sülen tang France national financial prosecutors' office ajanga Rafale ken o judicial ajanga bushisüngdangtsü tuyur.

Rafale tezüngzüktep agitsü atema France nung Dassault Aviation-i India nung tiyongtsü nung inyaker ka nem sübokrem Euro sen million 1 agütsü, ta tamalen tai tonglokja lir. Congress otongdar, Surjewala-i, iba ken o ya linük security aser maitsü den sendaktepa lir, anungji iba ken o ya Supreme Court-i masü saka Joint Parliamentary Committee (JPC) kati bushisüngdangtsüla, ta ashi. "Iba ken o nung ochimashi lir, ta France sorkari agizükogo, anungji ochimashi atalokba linük (India) nung JPC-i bushisüngdang masütsü no?" ta pai asüngdang. "Iba ken o ya Congress aser BJP na tsüngda masü saka linük security aser defence tezüngzüktep tulutiba nung ochimashi onük ka lir," ta pai ashi. "France-i inyakba ama Ato kiilonseri linük nem telangzüba agütsütsüla aser Ato kilonseri Rafale ochimashi bushisüngdangtsü atema JPC nem agütsütsüla," ta paisa shisem. French aerospace major Dassault Aviation dang nungi sen crore 59,000 agi Rafale tayimtsü 36 alizüktsü atema 2016 küm September 23 nü BJP-i aniba NDA sorkari tezüngzüktep agia liasü.

India nung ano nisung 44,111 dak Covid putet aser 738 asü

New Delhi, July 03 (Agencies): India nung ano nisung 44,111 dak coronavirus putet aser iba tashidak agi shiranger 738 süogo, ta Honibarnü Union health ministry-i metetdaksü. Tang tashi nung India nung nisung ajak agi 3,05,02,362 dak coronavirus putetogo aser iba tashidak agi shiranger 4,01,050 süogo. Tesüiba ghonda 24 tsüngda

coronavirus agi shiranger 57,477 anepogo aser tang linük nung iba tashidak agi teshirangdakpur 4,95,533 dang kümogo. Linük nung iba tashidak agi shiranger shilem 97.06 (nisung 2,96,05,779) anepogo; tanü agi anogo 51buba linük nung iba tashidak putetba dang nungibo shirangertem anepba timba, ta Health Ministry-isa metetdaksü. Tang hopta shia iba tashidak positive putetba shilem 2.50 dang

kümogo aser anogo shia positive putetba shilem 2.35 dang kümogo. Tang tashi nung linük nung samples ajak senteper crore 41.64 tendangogo. Honibarnep 7:00 ako tashi nung session 45,60,088 nung coronavirus vaccine dose 34,46,11,291 agütsüogo aser iba nungji tesüiba ghonda 24 tsüngda dose 43,99,298 agütsüba densema lir.



July 03, 2021 nü Patiala nung National Federation of The Blind-i parnok nem mapa agüjang ta takhangba agüja sorkar anema longkak aitba noksa nung angur.

PM aser BJP-i Puducherry nem state jenjang magütsütsü: Narayanasamy

Puducherry, July 03 (Agencies): Congress lenir, V Narayanasamy-i, Ato kilonser Narendra Modi-i Puducherry nem state jenjang agütsütsü atema bilema mali, ta ashi. Hokolbar aonung osangbenertem den jembidang pai, taküm February ita nung Modi-i election nüboyim atema Puducherry union territory semdangba mapang nung AINRC-i Puducherry nem state jenjang agüjang ta ashi, saka pai kecha melangzü, ta metetdaksü. "Iba takhangba onük nung Ato kilonseri ola madoker, aser ibaji ajanga pai Puducherry nem state jenjang agütsütsü bilema maliba sayur," ta paisa ashi. Tawa Puducherry nung BJP nungi minister ana aser BJP nungisa MLA tem telok kati

Delhi nung Ato kilonser aser Central Minister tem ajurua liasü, saka parnoki state jenjang atema kecha mejembi, ta Congress lenirisa metetdaksü. "Ibaji ajanga Ato kilonseri dang masü saka BJP-ia Puducherry nem state jenjang agütsütsü atema bilema maliba sayur," ta paisa shisem. Congress-i yimsüsüba mapang nung Congress party aser teloktep party temi state jenjang agüjang ta takhangba aiben agüja liasü, ta shia taoba mapang Chief Minister Narayanasamy-i, "Kodang state jenjang ngudir Puducherry rongsenkettsüng tajungba akümtsü. Sorkari agiba telemtetbatem tekaraba nung inyaksü aser Central Finance Commission nunga Puducherry züngoktsü," ta metetdaksü.



New Delhi, July 03, 2021: Linük nung petrol aser diesel jenjang atuba anema Honibarnü New Delhi nung Ministry of Petroleum & Natural Gas anasa Youth Congress züngsemtemi longkak aيتدang police-i parnok apuba noksa nung angur.

Badakhshan nung Taliban kiralongrar 20 tepset



Badakhshan province nung Honibarnü Afghan defence forces aser Taliban na raraba noksa ka yangi angur.

Kabul, Chiteni/July 3 (Agencies): Badakhshan province nung Honibarnü Afghan defence forces aser Taliban na khatapba sülen Taliban züngsem 20 tepsetogo. "Badakhshan nung taoba ghonda 24 tsüngda Taliban kiralongrar 20 aser sepai asem tepsetogo," ta Hobibarnü province yimtiba Abdul Razaq nung army officer kati ashi.

Kasa mapang nung local kari ashiba agi, Taliban züngsemtemi taoba ghonda 24 tsüngda Badakhshan kübok Tagab, Kishim, Tashkan aser Shahr-e-Buzarg districts

headquarters atsüngogo, ta Xinhua sangdong ka ajanga metetdaksü.

Afghanistan nung tawa azüdokshiba lendong aika ajangshia arudar, kechiyong Taliban puri asendenshir civilian, Afghan defence aser security forces maka arudar.

Rara agi raksatsür aliba linük nungi bendanger sepaitem atsüngiba mapang ka nung tang iba ya atalokdar.

Ajisüaka Badakhshan provincial government otongdar Nik Mohammad Nazari-i, Xinhua den sensaksemba mapang Taliban kiralongrartemi district

tem matsüng ta ashiba den rara maneni odar ta metetdaksü.

Taliban-i linük kübok district aika atsünga aoba mapang ka nung US intelligence-i, linük civilian sorkar ya US sepaitem atsünginba sülen ita ishika tsüngda kiralongrartemi atsüngtoktsü, ta shiogo.

Afghanistan nung küm aika raraba sülen US aser tanga bendanger sepaitemi Afghanistan toktsür aotsü telemtetba agiba sülen Afghanistan nung azüdokshi tali kümogo aser Taliba pur talenba küboki linük tanaben aitsü ta nüburttem shibulua bilemer.

Indian mission kolak nung drone yimzü ta India-i ashiba Pakistan-i magizük

Islamabad, Chiteni/July 3 (Agencies): Taoba hopta Islamabad nung amenoker aliba Indian High Commission complex kolak nung drone ya yimzüa aliba rüshio, ta India-i ashiba Pakistan-i magizük aser ashiba agi, iba taitsüba nongittsü atema kuli kecha magütsü.

New Delhi nung external affairs ministry-i Hokolbarnü ashiba agi, taoba hopta Islamabad nung Indian High Commission complex kolak nung drone ka yimzüa aliba rüshio aser Pakistan dang iba ken o bushitsüngdangtsü

asüngdangba den security dak sendakba nung iba amala tatalokba tanaben mataloktsü atema jenjang tapet agitsü shiogo.

Indian mission-isa, Pakistan nung iba tatalokba dak sendakba nung note verbale (diplomatic communique) ka ajanga ken o ashishiogo, ta ken o jangjaa aliba nisung kari New Delhi nung ashi.

June 27 nü drone tem nung bomb inoker Jammu Air Force station amakba sülen security establishment dak sendakba nung tebilemstü adoker aliba

mapang tang iba ya atalokogo.

Foreign Office otongdar Zahid Hafeez Chaudhri-i, osangbenertem den sensaksemba mapang, iba ken o ya "Indian propaganda" ka ta ashi.

"Onoki India nung media balala nung Islamabad nung Indian High Commission kolak nung drone ya yimzüba indang Indian MEA sangdongba osang nguogo.

"Taitsüba medentsü atema Pakistan nem kuli kecha magütsü anungji iba taitsüba ya tamendakdak maka," ta pai ashi.



Bangkok, July 3: Myanmar nung military anema longkak aitertemi Honibarnü junta lenir Min Aung Hlaing asoba anogo pa indang noksa rongtoktsüba den pa den asüpila sentong agiba jilushiogo. February 1 nü military-i civilian lenir Aung San Suu Kyi-i aniba sorkar atsüngtokba sülen linük ajunga nung longkak aitba den military-i tashiyim amshia arudar. Tang tashi nung iba mepetmesü nung civilian 890 dak tema süogo aser sepaitemi nisung 6,500 shi puogo. Honibarnü longkak aitertemi social media nung traditional noodle soup dish, 'mohinga' indang noksa lemsatepa liasü, koba Myanmar nung asüpila sentong agiba mapa amshir.

Canada nung mopung tatsük aonba agi nisung 700 süogo

Ottawa, Chiteni/July 3 (Agencies): Pacific Northwest nung mopung tatsüka aonba ajanga Canada nung taoba hopta ka tsüngda nisung 700 süogo, ta ketdangsürtemi metetdaksüba den mopung tatsüka aonba ajanga adokdaksüba morokmi lendong nung British Columbia kübok Lytton yimtsüng nung nisung ana süogo, ta ashi. Hopta tetenzüki iba tesem nung temperature 49.6°C tashi atuba mangaoka lir.

Canada antölen aser talisa British Columbia (BC) kübok tesem noklang ka dak tema nung mopung tatsük aonba ajanga morokmi adoker lir aser item rongnung kati Lytton temeker shilem 90 shi raksatsüogo.

Iba timtem lendong tulu adokba sülen Canada Ato Kilonser Justin Trudeau-i, linük nung incident response group den jongdak senden ayongzüka menogo aser British Columbia dak rangloker iba mepetmesü aziöktüsü atema jembishinüogo.

Morokmi lendong tetashi ataloker aliba ajanga Lytton temeket nung inyaksangshi mejungi kümogo aser bushitsüngdangertemi yimtsü nung nisung ana asüba osang tejangja magütsüteti lir.

Lytton nung Deobarnü nungi Mongolbarnü tashi temperature kanga tatsük akümba sülen iba tesem nung alirtem Bodhbarnü

aninogo. Lytton aser temeket nung alir nisung 1000 shi tekümzüka tesem bushia aninogo.

BC Wildfire Service-i, morokmi adoker aliba ya mazüokteti odar ta shiogo aser ali hectare 6,400 rongka alitsü ta asatetogo.

BC chief coroner Lisa Lapointe-i, osangbenertem dang ashiba agi, hopta tatemi iba province nung nisung 719 ajungbena asüba mangaoka lir, koba average dang nungi asemben agi timba lir.

"Taoba hopta BC nung mopung tatsüka aonba ajanga nisung tasüba aika ataloker asütsü ta bilema onoki iba osang lemsateper," ta Lapointe-i ashi.

"Item number tem ya tatembang masü aser ano timba akümtsü kechiyong onok systemi nisung asüba osang maneni aitdar," ta lai shisem.

Anogo pongu tsüngda nisung 486 asüba June 30 nü sangdongogo.

BC Wildfire Service-i ashiba agi, province nung tang tesem 136 nung morok mi adoker lir aser tesem teku nungbo nüburttem asoshi lendong keta lir.

Trudeau aser emergency task force senden amenba mapang, Alberta province kübok Edmonton yimti nung morok mi agi kongshir alirtem anintsü atema air support aser personnel tem renema liasü.



Moscow, July 3: Russia nung Honibarnü taoba ghonda 24 tsüngda nisung 697 COVID-19 tashidak asüba sangdongogo. Russia nung tang Delta variant den raraba mapang ka lir aser anogo pongububa atonga nisung aika südar. Kasa mapang nung nisung 24,439 dak tashidak potetogo, koba January ita sülen timtiba potetba asütsü.

Saudi Arabia-i UAE, Vietnam, Ethiopia nem tenokdangba agütsü

Riyadh, Chiteni/July 3 (Agencies): United Arab Emirates, Ethiopia aser Vietnam nung coronavirus strains balala prokshia aoba ajanga Saudi Arabia-i item linüktem nungi lisopurtemi Saudi-i maittsü atema tenokdangba agütsüogo, ta media sangdong ajanga metetdaksü.

Saudi nungertem item linüktem semdangtsü atema temelaba agütsüogo, saka chubayimli ketdangsürtem ket nungi mezüng temelaba meshitsüla, ta state meyong SPA news agency sangdong ka ajanga metetdaksü.

Iba tetuyuba tasen ya Deobarnü nungi benoka inyaksangshitsü.

World Health Organization-i COVID-19 tashidak poktetba ya pandemic ka ta 2020 küm March ita 11 nü sangdonga liasü. Tanü tashi nung iba tashidak agi alima ajunga nung nisung million 183.01 dak kongshiogo aser nisung million 3.96 süogo, ta Johns Hopkins University sangdong ka ajanga metetdaksü.

Saudi Arabia nung tang tashi nung COVID-19 tashidak agi nisung 490,000 tema dak kongshiogo aser nisung 7,800 dak tema süogo.

CMO-i Shamator Circle semdang



Tuensang, Chiteni/July 03, 2021 (TYO): Honibarnü, Nodal Officer for COVID-19, Tuensang, Dr. John densema Chief Medical Officer, Tuensang, Dr. Lanuchuba aser medical team nati Shamator circle health center tem semdang, ta sangdong ka ajanga

metetdaksü. Iba tour mapang, team-i Shamator CHC aser Wapher sub-center semdang. Item centre nung inyakba maparen reprangshimsü aser asadangsü nükjidadong nung team-i iba tour ayongzüka liasü. Kasa mapang, team-i

COVID vaccination drive indang staff tem den ajurutepa vaccination campaign indang jembishinüa liasü aser Covid-19 wara lendong nung alir lokti tem jangjateta Covid-19 test agitsü asoshi staff ajak ajungshio, ta sangdong ka ajanga metetdaksü.

Nikiye aser Thazuvi nung sensitization sentong agi

Kiphire, Chiteni/July 03, 2021 (TYO): Honibarnü, Sitimi, EAC, HQ, Kiphire kübok Nikiye aser Thazuvi yimtsü nung Land Resources Department, Kiphire den Medical team

longjemer Covid-19 vaccination dak sendakba nung sensitization sentong ka ayonga agiogo. Team lenir ji DPO, LRD, Ahozhe Sama liasü. Alima ajunga asünga

Covid-19 anema raraba mapatong nung shilem agia, team-i yimtsü anaprongla nung yimertem dang Covid Vaccine agitsü tongtibangtem indang rasa ashi, ta sangdong ka ajanga metetdaksü.

NPF, 30 Alongtaki AC-i arrtsü nung ken o bentettsü mepeshi

Dimapur, Chiteni/July 3 (TYO): Assam aser Nagaland na tsünga Vikoto yimtsü (Tsürangkong) nung mangatettep adoker aliba ya 30th Alongtaki Constituency kübok lir anungi 30th Alongtaki Constituency Naga People's Front (NPF)-i ola adoktsüla ta angateter, ta tir S. Samuel Longkumer aser General Secretary T. Shilu Imchen nati sangdong ka ajanga metetdaksü.

Arrtsü nung mangatettep aliba bentettsü atema Nagaland aser Assam sorkar, Supreme Court of India-i tongtibang shilem agitsüla aser kümtem tsünga mangatettep bentettsü atema nangzüktepbatem ajak benoka inyaksangshitsü nungdaker, ta lenirtemi ashi.

Mariani local MLA-i teyari agüja Assam Police-i arrtsü nung aliba yimjung meimba nüburtem minprongba ya odangbo sendoka metoktsütettsü. Assam Police-i tashi amshia arrtsü nung iba ali parnok meyong ta shia inyaksangshiba ajanga asen nüburtem taküm aser security amokmerener. Küm ana tsünga iba amala tatalokba ya asemenbuba atloker, ta kasa sangdong ajanga metetdaksü.

Ajisüaka, state sorkari iba ken o sentoka toktsüba atema onok temulung masür. State sorkari Naga nunger tejangraba wazüka toktsütsü asoshi tang tashi nung jenjang tapet agia mali. Anungji 30th Alongtaki Constituency, NPF-i, state sorkar dang arrtsü nung mangatettep adoker aliba takaratiba nung bentettsü aser yimjung bener arutsü atema state sorkar dang Assam sorkar den sensaksem ayongzüka akatsü mepeshir, ta tir S. Samuel Longkumer aser General Secretary T. Shilu Imchen natisa metetdaksü.

Security Forces-i nisung asem apu



Dimapur, Chiteni/July 03, 2021: Bresthibarnü (01.07.2021) 4th Mile, Dimapur District nung Security Forces-i nisung asem apu aser ozüng alema belenba cosmetics angu.

Iba dak sendakba nung maneni bushisüngdangtsü atema, pua alir nisung asemprongla aser osettem Customs Officials Dimapur Division, Dimapur District nung agütsüogo, ta kasa sangdong nung shia lir.

Pungro yimtak vaccination drive agi

Kiphire, Chiteni/July 03, 2021 (TYO): ADC, Pungro, Abhinav Shivam, IAS matsüngdang, Dr. Siku aser Dr. K. Nakhro nati anir Medical team kati Honibarnü (03.07.2021) Kiphire kübok Pungro yimtsü nung sensitization sentong ka ayonga agia liasü.

Iba sentong temer sülen, vaccination session ka ayongzü, kong Pungro yimtsü nung temsüa alir nisung 103 tashi nem vaccine agütsüogo. Kasa anogo Shorih ward nunga vaccination drive agitsü asoshi team-i sentong renem, ta sangdong ka ajanga metetdaksü.



Dimapur, Chiteni/July 03, 2021: Security Forces den Police longjemer, Bresthibarnü (01.07.2021) Thilixu, Dimapur District nung ozüng alema Burma nungi meima belenba Teak süng apu. Osang tejangja ka nung ajemdaker, Security Forces den State Police longjemer Thilixu tesem mita aoba mapang sen cr. 5 alang Burma Teak süngdem (log) 1296 shi ngutet. Iba maparen dak sendakba nung maneni bushisüngdangtsü atema Teak süngdem ajak Forest Department, Dimapur District nung agütsüogo.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

NO.DET-2/14/2001/PT-1/336 **Dated Kohima, the 3rd July '2021**

ADVERTISEMENT

Applications in the prescribed form are hereby invited from bonafide local candidates for undergoing training at various Govt. Industrial Training Institutes under Craftsmen Training Scheme for the session 2021-2022/23. Name of the Institutes, sanctioned trades, duration of courses and minimum Educational qualification required are given below:
SESSION: 2021-2022/23.

Sl. No	TRADES	DURATION OF COURSE	MINIMUM EDUCATIONAL QUALIFICATION	NAME OF GOVT ITIs	
				*NCVT	*SCVT
A. Engineering Trades					
1.	Carpenter	1 year	8 th Passed	Kohima, Wokha, Phek, Tuensang.	Kohima, Mon, Kiphire
2.	Plumber	1 year	8 th Passed		Kohima, Phek, Zunheboto.
3.	Welder	1 year	8 th Passed	Kohima.	
4.	Mason (Building Constructor)	1 year	8 th Passed		Kohima.
5.	Mechanic Diesel	1 year	10 th Passed with Maths	Kohima.	Tuensang
6.	Machinist	2 years	10 th Passed with Maths & Science	Kohima.	
7.	Draughtsman (Civil)	2 years	10 th Passed with Maths & Science	Mokokchung	Mokokchung
8.	Electrician	2 years	10 th Passed with Maths & Science	Kohima	Mon
9.	Fitter	2 years	10 th Passed with Maths & Science	Kohima	
10.	Information & Communication Technology System Maintenance (I&CTSM)	2 years	10 th Passed with Maths & Science	Kohima	
11.	Mechanic Motor Vehicle	2 year	10 th Passed with Maths		Mokokchung, Wokha, Phek, Tuensang
B. Non-Engineering Trades.					
1.	Cutting & Sewing	1 year	8 th Passed	-	Kohima, Mon, Tuensang, Wokha, Phek,
2.	Knitting	1 year	8 th Passed	-	Kohima, Dimapur, Mon.
3.	Sewing Technology	1 year	8 th Passed	Dimapur.	Kiphire
4.	Dress Making	1 year	8 th Passed	-	Zunheboto.
5.	Computer Operator & Programming Assistant (COPA)	1 year	10 th Passed	Mokokchung, Zunheboto, Mon,	Kohima, Dimapur, Wokha.
6.	Hair & Skin Care	1 year	10 th Passed	-	Kohima, Dimapur, Phek.
7.	Stenography	1 year	10 th Passed	-	Dimapur.
8.	Secretarial Practice	1 year	10 th Passed	Mokokchung.	Dimapur

*NCVT- National Council for Vocational Training (Under Central Govt.)
*SCVT- State Council for Vocational Training (Under State Govt.)
N.B:
1. Candidates applying for the admission must be above 14 (fourteen) years of age as on 1st August, 2021 and there is no upper age limit.
2. Application forms will be available w.e.f. 07/07/2021 from respective Govt. ITI, on any working day during office hours, or may apply online (http://nagalandgiti.com)
3. Seating capacity in each trade is 20 (Twenty), whereas, Carpenter, Knitting and Cutting & Sewing trades in Govt. ITI Kohima is 40 (forty) each.
4. Cost of application form for offline is Rs. 50/- (Rupees Fifty) only.
5. Last date of submission of form is 30/07/2021. Applicants applying through offline should submit their forms at the respective Govt. ITI, where they wish to undergo training.
6. Selected list will be notified on or before 05/08/2021 on merit basis at respective Govt. ITI's.
7. Last date of admission for selected candidates is 13/08/2021.
8. Only women candidates need apply for Women ITI, Dimapur.
9. Selected candidates will be paid stipend @ Rs. 500/- PM.

Sd/-
CHIDEN YADEN
Director

Issued by DIP



Euro 2020 football asayamong quarter finals asaya Honibar aonung mezüng asaya nung Denmark-i goal 2-1 agi Czech Republic koker semifinal-i iogo. Iba asayamong ya Baku Olympic Stadium, Azerbaijan nung asayaa liasü. Iba asayamong tenzükli minute 5 tsüngda Denmark asayar Thomas Delaney-i mezüng goal agütsü aser ano first half nungsa Demark asayar Kasper Dolberg-i goal ka agütsü. Iba sülen 2nd half tenzükli Czech Republic asayar Parick Schick-i goal ka agütsü saka parnoki ano goal kaji meküpdokteti asaya tema adok. 1992 küm Denmark-i Euro asayamong nung takok anguba sülenbo tangang semi final atonger asütsü. Joko Czech Republic telokbo Euro 2020 asaya nungi tuguadokogo.(July 03, 2021)

Wimbledon: Coco aser Matteo na round of 16 tongogo

London, Chiteni/July 03, 2021 (Agencies): Honibarnü, Wimbledon asayamong - tetsür kija tasembuba round asaya nung, arishi küm 17 tain America tsür Coco Gauff-i 6-3, 6-3 Kaja Juvan tsükdakja pezübuba round tongogo. 2019 küm Gauff-i iba asayamong pezübuba round tongteta liasü. Küm ana sülen, asayar tasen ka asüyongjia, Gauff-i Grand Slam tournament tenetbuba nung shilem agir alitsü aser taküm lai Wimbledon title akoktsü tebilemba nung meranga asayadar. Gauff aser Juvan na asaya tenzüker, minute 18 nung Gauff 5-1 agi tejakdang kümadok, saka

game ana tashi lai atonga tamakok ngua Juvan-i point ana agitsü maongka ngutet. Mezüng set akokba sülen, tanabuba set nunga Gauff-i Juvan amokbanger asaya. Iba set mekokdaksütsü atema Slovenia tsür Juvan-i kanga dang meranga Gauff den toktepa asaya, saka lai Gauff amokbangtsü maongka mengutet. Taküm, Wimbledon asayamong nung Gauff-i round asem tashi set ka nung danga tamakok mengudang, saka round of 16 koktetsü atema lai Kerber den junga asayatsü nüngdaker. Hombarnü (05.07.2021) Gauff-i round of 16 nung Germany tsür Angelic Kerber den

asayatsü. Tetsür kija tasembuba round asaya tanga ka nung, taoba mapang Wimbledon champion, Angelique Kerber-i 2-6, 6-0, 6-1 agi Aliaksandra Sasnovich tsükdaksüiogo. Kasa asayamong, tebur kija tasembuba round tetoktepa nung, Italy nunger Matteo Berrettini-i Slovenia nunger Aljaz Bedene madak 6-4, 6-4, 6-4 agi koka pezübuba round-i iogo. Round of 16 nung Matteo-i Belarus nunger Ilya Ivashka den asayatsü. Külem Italy nunger seed 23buba Lorenzo Sonego-ia 6-3, 6-4, 6-4 agi Australia nunger James Duckworth tsükdakja round of 16 tongogo.

Euro 2020: Italy-i Belgium tsükdaktsü; Spain den semi final asayatsü



Spain-i Switzerland madak takok ngur pelatepba yngi noksa nung angur.

Munich, Chiteni/July 03, 2021 (Agencies): Tang asaya aliba Euro 2020 nung, Hokolbarnü Italy-i goal 2-1 agi Belgium koka semi final tongtetogo. Italy nungi Nicolo Barella aser Lorenzo Insigne nati mezüng half nung goal ka ka idaktsü aser parnoki kanga dang meranga asaya jenjang temaba nung alir team (Belgium - FIFA ranking 2021) ka tsükdaksüiogo. Italy aser Belgium na asaya tenzüker, mezüng half nung Lorenzo Insigne-i goal tanabuba meinoktsüdang, Barella-i minute 31 sülen Italy atema mezüng goal idaktsü. Mezüng half temer mapang talila apuloktsür asayaba mapang, Romelu Lukaku-i Belgium atema goal ka idaktsü. Break sülen, kanga dang toktepa asayaba team - Belgium aser Italy napronglai goal idaktsütsü maongka angu, saka mezüng half nung idaktsüba goal dak alaka telok kati danga goal talila mebendenlok aser Roberto Mancini'er teloki (Italy) game 32 tashi nung khen danga tamakok mengui aruba record

atsülanga asaya 13ben buba tashi atonga takok angu. Euro 2020 final tongtetsü atema, Mongolbarnü Wembley nung Italy-i Spain den semi-final asayatsü. Kasa asayamong quarter asaya tanga ka nung, Spain aser Switzerland na goal 1-1 draw nung tembangba sülen, penalty metsütepba nung Luis Enrique'er teloki goal 3-1 agi Switzerland tsükdaksüba sülen, Spain team-a semi final-i iogo. Italy aser Belgium na asaya tenzüker, Italy-i free-kick ka metsütsü maongka angu aser Leonardo Bonucci-i minute 13buba nung goal idaktsüba mapang, Italy pur kara asaya asüba ajanga iba goal magizük. Midfielder, Kevin de Bruyne-i goal idaktsütsü meranga ball ka Italy keeper Gianluigi Donnarumma-i teka kati nokdang. Ibaji masüdang, Lukaku-i metsüloktsüba goal ka Gianluigi-i nokdanga liasü. Tan asayamong nung, Italy puri goal 10buba idakja liasü, koba European Championship nung Azzurri (Italy national football team) indang goal timtiba alitsü.

Copa America: Brazil semi final-i iogo



Rio de Janeiro, Chiteni/July 03, 2021: Copa America asayamong - quarter final nung Brazil aser Chile na asayaba mapang, Lucas Paqueta-i (achiji) Brazil atema mezüng goal idaktsür sülen külem team pur den pungdena pelatepba noksa nung angur.

Rio de Janeiro, Chiteni/July 03, 2021 (Agencies): Brazil aser Chile na Copa America tie asayaba mapang, asaya tom nung Gabriel Jesus red card ngua asaya nungi tukadok, saka Brazil-i goal 1-0 agi Chile tsükdakja semi final tongogo. Taruba hopta, Mongolbarnü, Nilton Santos stadium nung Brazil-i Peru den semi-final asayatsü. Kasa asayamong asaya tanga ka nung, Peru-i Paraguay kokogo. Team anaprongla goal 3-3 nung asaya tembangba sülen, penalty

metsütep, kong Peru-i goal 4-3 agi Paraguay tsükdaktsü. Tanüngba quarter-final nung Argentina o Ecuador aser Uruguay o Colombia na asayatsü. Brazil pur asaya 11 nung khen danga tamakok mengudang aser Group B nung parnoki temaba jenjang tongteta lir. Kasa mapang, Group A nung Chile pur jenjang pezübuba tashi luogo aser parnok indang taoba asaya trok nungi asaya pezü tashi goal 1-1 draw nung tembang. Iba asaya mezüng half nung telok kati danga goal

meinoktsüteti tembang. Tanabuba half tenzükli, Brazil substitute Lucas Paqueta-i minute 46buba nung mezüng goal idaktsüba mapang, telok ana tsüngda toktepa asaya liasü. Ajisüaka, minute ana sülen, asaya yimya melenshiadok, kong Gabriel Jesus-i asaya den mapet yimya benshia Eugenio Mena dak metsülokja alangdaktsüba sülen, Brazil pur asayar 10 dang kümadok. Gabriel dang taochi kecha mesayui referee-i pa nem indang indanga red card agütsü. England nung soa intetsang, Ben Brereton, shibai half time nung Alexis Sanchez melena asaya liasü, pai goal idaktsütsü maongka angu, saka pa kolak agi tongoktsüba ball ya post nung ondaker tukadok aser külem team puri idaktsütsü merangba goal ana tashi Brazil goalkeeper Ederson-i nokdangtet. Chile, shirnoki 2015 aser 2016 küm Copa America asayamong takok angu, tan asayamong quarter final nung parnoki goal ka danga meinoktsütet aser asayamong nungi tsükogogo. "Alima ajunga nung football meimer temi kanga sapuba team (Brazil) kati onok tsükdaksüiogo. Onoki Brazil makok yongjia, quarter-final nung parnok den asayatsü maongka anguba asoshi nümatanga bilemer," ta asaya temer sülen Chile indang midfielder, Arturo Vidal-i ashi.

BILEMDANGANG
 "Ya tatembang ta ashitsü meimchir dak kecha lenmang nungia temeten maka."